



## Kekić i Smajić uhapšeni zbog ratovanja u Siriji

Policijski službenici Državne agencije za istrage i zaštitu (SIPA), u okviru akcije Damask, u utorak su na Međunarodnom aerodromu Sarajevo lišili slobode osumnjičene Osmana Abdulaziza Kekića (1970) iz Bosanske Dubice i Muharema Smajića (1972) iz Gračanice. Osumnjičeni će biti predati postupajućem tužitelju Odsjeka za terorizam Tužiteljstva BiH, koji će ih ispitati i nakon toga donijeti odluku o daljnjim aktivnostima, saopćeno je jučer iz SIPA. Kekić i Smajić su izručeni sa područja Republike Turske u BiH, nakon što su tamo proveli određeni vremenski period u pritvoru, a radi se o osobama koje su sudjelovale na ratištima u Siriji i Iraku na strani ISIL-a, te se sumnja za kazneno djelo Organiziranje terorističke skupine, saopćeno je iz Tužiteljstva.



Također, navodi se da Tužiteljstvo BiH i sigurnosne agencije dobijaju sve više kontakata od državljana BiH, koji se nalaze na području Sirije i Iraka, a koji traže od institucija BiH da se zbog nesnošljivih uvjeta boravka i opasnosti po život i sigurnost na navedenom području vrate u BiH. "Navedene osobe iskazuju i spremnost na sporazumna priznanja krivnje i izdržavanje kazne po povratku u BiH", stoji u saopćenju.